



"PERKARA HALAL YANG DIBENCI ALLAH"

(29 November 2019/ 2 Rabiulakhir 1441H)

الْحَمْدُ لِلَّهِ الَّذِي جَعَلَ الْإِتِّحَادَ وَالْإِعْتِصَامَ تَقْوِيَةً لِلْأُمَّةِ الْإِسْلَامِيَّةِ وَحِثَّنَا عَلَى الْإِنْتِصَافِ
بِهِمَا فِي كُلِّ زَمَانٍ وَمَكَانٍ، وَحَرَّمَ الْإِفْتِرَاقَ وَالْإِخْتِلَافَ بَيْنَنَا.

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ.

اللَّهُمَّ صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ وَمَنْ دَعَا إِلَى سُنَّتِهِ.

أَمَّا بَعْدُ، يَا عِبَادَ اللَّهِ، اتَّقُوا اللَّهَ، أَوْصِيَكُمْ وَإِيَّايَ بِتَقْوَى اللَّهِ، فَقَدْ فَازَ الْمُتَّقُونَ.

Sidang Jumaat Yang Dirahmati Allah sekalian,

Saya menyeru dan berpesan kepada diri saya sendiri dan juga sidang Jumaat sekalian, marilah kita sama-sama berusaha untuk meningkatkan ketaqwaan kepada Allah SWT iaitu dengan melaksanakan segala suruhan-Nya dan meninggalkan segala larangan-Nya. Inilah bukti ketaatan kita pada perintah Allah, mengutamakan ajaran al-Quran dan al-sunnah, mudah-mudahan diri kita lebih dekat dengan Allah dan seterusnya memperoleh keberkatan hidup di dunia dan di akhirat. Mimbar hari ini akan membicarakan khutbah yang bertajuk: **"PERKARA HALAL YANG DIBENCI ALLAH"**.

Sidang Jumaat Yang Dirahmati Allah Sekalian,

Hidup berpasangan merupakan fitrah semulajadi manusia. Setiap sesuatu ada pasangannya; umpama siang dan malam, matahari dan bulan. Perkahwinan menemukan pasangan lelaki dan perempuan untuk mengharungi segala suka duka kehidupan. Umpama gigi dan lidah, sudah menjadi asam garam dalam sesebuah perkahwinan, konflik kadangkala tidak dapat dielak. Namun kebijaksanaan menguruskan konflik amat perlu bagi mengekalkan keharmonian perkahwinan tersebut.

Namun, Islam membenarkan perceraian sekiranya masalah tersebut menjadi semakin besar dan sukar untuk ditangani. Perceraian merupakan jalan terakhir setelah beberapa langkah diambil bagi menyelamatkan perkahwinan. Perceraian merupakan suatu perbuatan yang sangat tidak digalakkan malah amat dibenci oleh Allah SWT. Hal ini berdasarkan sebuah hadis Rasulullah SAW yang diriwayatkan oleh Ibnu Majah R.A :

عَنْ عَبْدِ اللَّهِ بْنِ عُمَرَ رَضِيَ اللَّهُ عَنْهُ قَالَ، قَالَ رَسُولُ اللَّهِ ﷺ: " أَبْغَضُ الْحَلَالِ إِلَى اللَّهِ تَعَالَى الطَّلَاقُ".

Maksudnya: *“Dari Abdullah bin Umar R.A berkata, Rasulullah SAW bersabda: Sesuatu yang halal tetapi sangat dibenci oleh Allah SWT adalah talak”.*

Sidang Jumaat Yang Dirahmati Allah Sekalian,

Walaupun Islam menghalalkan perceraian atas sebab-sebab yang tidak dapat dielakkan, namun terdapat beberapa langkah atau cara perlu diambil sebelum perceraian berlaku. Hal ini adalah berdasarkan Firman Allah SWT dalam surah an-Nisa' ayat 35:

أَعُوذُ بِاللَّهِ مِنَ الشَّيْطَانِ الرَّجِيمِ

وَأِنْ خِفْتُمْ شِقَاقَ بَيْنِهِمَا فَأَبْعَثُوا حَكَمًا مِّنْ أَهْلِهِ وَحَكَمًا مِّنْ أَهْلِهَا إِنْ يُرِيدَا إِصْلَاحًا يُوَفِّقُ اللَّهُ بَيْنَهُمَا إِنَّ اللَّهَ كَانَ عَلِيمًا خَبِيرًا

Maksudnya: *“Dan jika kamu ketahui ada perselisihan di antara keduanya (suami isteri), maka kirimlah seorang penimbang tara daripada keluarga lelaki dan seorang penimbang tara daripada keluarga perempuan. Jika kedua-dua penimbang tara itu menghendaki perdamaian, nescaya Allah memberi taufik kepada suami isteri itu. Sesungguhnya Allah Maha Mengetahui lagi Maha Mengenal.”*

Firman Allah lagi dalam surah an-Nisa' ayat 130:

أَعُوذُ بِاللَّهِ مِنَ الشَّيْطَانِ الرَّجِيمِ

وَإِنْ يَتَفَرَّقَا يُغْنِ اللَّهُ كُلًّا مِّن سَعَتِهِ ۚ وَكَانَ اللَّهُ وَاسِعًا حَكِيمًا

Maksudnya: *“Jika kedua-duanya bercerai, maka Allah akan memberi kesenangan kepada setiap orang daripada mereka daripada limpah kurnia-Nya. Dan Allah Maha Luas (kurnia-Nya) lagi Maha Bijaksana”.*

Islam telah menetapkan hak untuk melafaz perceraian di tangan suami. Namun hak tersebut bukanlah kuasa mutlak suami semata-mata kerana perceraian juga boleh berlaku melalui pembubaran perkahwinan yang merupakan kuasa seorang Hakim.

Hal ini kerana terdapat segelintir suami yang sengaja enggan melafazkan cerai walaupun telah cukup syarat-syarat untuk bercerai disebabkan dendam dan ingin membiarkan isterinya dalam keadaan gantung tidak bertali. Justeru, bagi mengatasi masalah tersebut, pembubaran perkahwinan boleh dibuat sama ada melalui fasakh, *ta'liq* atau *khulu'* (tebus talaq).

Sidang Jumaat Yang Dirahmati Allah Sekalian,

Berdasarkan statistik yang telah diperolehi daripada Jabatan Kehakiman Syariah Negeri Pulau Pinang (JKSNPP), sebanyak 2386 kes perceraian telah didaftarkan pada tahun 2018 melibatkan pasangan Islam di negeri ini. Statistik menunjukkan bahawa kes perceraian meningkat saban tahun dan akan menjadi suatu barah kepada masyarakat Islam.

Permohonan perceraian terbahagi kepada dua, iaitu; **pertama: perceraian secara persetujuan bersama. Kedua: Pembubaran perkahwinan.** Bagi perceraian persetujuan bersama, permohonan boleh dibuat sama ada oleh suami atau isteri. Sekiranya salah satu pihak tidak bersetuju dengan perceraian, suatu Jawatankuasa Pendamai (JKP) akan dibentuk di mana pihak suami dan isteri hendaklah melantik seorang wakil bagi pihak masing-masing. Jawatankuasa Pendamai ini bertindak untuk mendamaikan suami isteri. Namun, sekiranya pasangan suami isteri tidak dapat didamaikan, prosedur perceraian secara persetujuan bersama diteruskan dengan Hakam.

Hakam merupakan langkah terakhir dalam perceraian secara persetujuan bersama. Hakam terbahagi kepada dua iaitu Hakam keluarga dan Hakam pihak mahkamah. Hakam keluarga merupakan wakil yang dilantik oleh pihak suami dan isteri bagi bertindak untuk pihak mereka. Sekiranya Hakam keluarga gagal memainkan peranan, Hakam mahkamah pula akan dibentuk. Hakam mahkamah merupakan wakil yang telah dilantik oleh Hakim. Hakam ini mempunyai kuasa yang penuh dan boleh melafazkan cerai bagi pihak suami sekiranya dibenarkan oleh Hakim. Manakala perceraian melalui pembubaran perkahwinan seperti fasakh, *ta'liq* dan *khulu'* (tebus talaq) adalah merupakan kuasa seorang Hakim.

Pembubaran perkahwinan hanya akan berlaku apabila seorang Hakim berpuas hati dengan perbicaraan dan mendapati pasangan mempunyai syarat-syarat yang cukup untuk dipisahkan.

Sidang Jumaat Yang Dirahmati Allah Sekalian,

Pada masa kini, disebabkan dunia semakin maju dan teknologi maklumat yang berkembang begitu pesat, kadar perceraian juga semakin bertambah. Perceraian boleh terjadi daripada beberapa medium dan cara, antaranya melalui "*facebook*", "*whatsapp*", "*twitter*" dan sebagainya.

Menurut Seksyen 57 Enakmen Undang-Undang Keluarga Islam Negeri Pulau Pinang, seseorang lelaki yang telah menceraikan isterinya dengan lafaz talaq di luar Mahkamah dan tanpa kebenaran Mahkamah, hendaklah dalam tempoh masa tujuh hari daripada lafaz talaq itu melaporkan ke Mahkamah Syariah. Kegagalan untuk melaporkan ke Mahkamah Syariah boleh menyebabkan seseorang akan dijatuhkan hukuman denda tidak melebihi RM1,000 atau penjara tidak melebihi enam bulan atau kedua-duanya menurut Seksyen 125 Enakmen Undang-Undang Keluarga Islam Negeri Pulau Pinang.

Sidang Jumaat Yang Dirahmati Allah Sekalian,

Mengakhiri khutbah marilah kita sama-sama selaku pemimpin keluarga, pimpinlah ahli keluarga kita ke arah kebaikan di dunia dan di akhirat. Tanamlah rasa takut kepada Allah SWT dengan melaksanakan perintah-Nya dan meninggalkan larangan-Nya. Sekiranya perceraian telah pun berlaku, janganlah dilupa tanggungjawab sebagai seorang bapa kepada anak-anak hasil perkahwinan tersebut. Jangan diabaikan kebajikan mereka. Ingatlah, segala-galanya akan dipertanggungjawabkan di sana kelak.

Firman Allah SWT dalam surah an-Nisa' ayat 19:

أَعُوذُ بِاللَّهِ مِنَ الشَّيْطَانِ الرَّجِيمِ
... وَعَاشِرُوهُنَّ بِالْمَعْرُوفِ فَإِنْ كَرِهْتُمُوهُنَّ فَعَسَى أَنْ تَكْرَهُوا شَيْئًا وَيَجْعَلَ اللَّهُ فِيهِ خَيْرًا
كَثِيرًا

Maksudnya: “... *Dan bergaul lah kamu dengan mereka (isteri-isteri kamu itu) dengan cara yang baik. Kemudian jika kamu (merasai) benci kepada mereka (disebabkan tingkah lakunya, janganlah kamu terburu-buru menceraikannya), kerana boleh jadi kamu bencikan sesuatu, sedang Allah hendak menjadikan pada apa yang kamu benci itu kebaikan yang banyak (untuk kamu)*”.

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ
الْحَكِيمِ، وَتَقَبَّلَ مِنِّي وَمِنْكُمْ تِلَاوَتَهُ، إِنَّهُ هُوَ السَّمِيعُ الْعَلِيمُ. أَقُولُ قَوْلِي هَذَا وَأَسْتَغْفِرُ اللَّهَ
الْعَظِيمَ لِي وَلَكُمْ، وَلِسَائِرِ الْمُسْلِمِينَ وَالْمُسْلِمَاتِ، وَالْمُؤْمِنِينَ وَالْمُؤْمِنَاتِ، فَاسْتَغْفِرُوهُ إِنَّهُ
هُوَ الْغَفُورُ الرَّحِيمُ.



خطبة كدوا

(Bulan November 2019)

الْحَمْدُ لِلَّهِ نَحْمَدُهُ وَنُسْتَعِينُهُ وَنَسْتَغْفِرُهُ، وَنَعُوذُ بِاللَّهِ مِنْ شُرُورِ أَنْفُسِنَا وَمِنْ
سَيِّئَاتِ أَعْمَالِنَا، مَنْ يَهْدِهِ اللَّهُ فَلَا مُضِلَّ لَهُ، وَمَنْ يَضِلَّ فَلَا هَادِيَ لَهُ.

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ مُحَمَّدًا عَبْدُهُ وَرَسُولُهُ.

اللَّهُمَّ صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ وَالتَّابِعِينَ بِإِحْسَانٍ إِلَى يَوْمِ
الدِّينِ.

أَمَّا بَعْدُ، فَيَا أَيُّهَا الْإِخْوَةُ الْمُؤْمِنُونَ! اتَّقُوا اللَّهَ، أَوْصِيكُمْ وَإِيَّايَ بِتَقْوَى اللَّهِ فَقَدْ فَازَ الْمُتَّقُونَ.

Sidang Jumaat yang dirahmati Allah,

Saya berpesan kepada tuan-tuan dan diri saya sendiri supaya bertakwa kepada Allah SWT dengan mematuhi segala perintah-Nya dan menjauhi segala larangan-Nya. Sesungguhnya berbahagialah orang yang bertakwa kepada Allah. Di samping itu, sebagai tanda mensyukuri segala nikmat Allah yang dikurniakan kepada kita, marilah kita mencontohi akhlak nabi SAW dan para sahabat sehingga mereka digelar jutawan akhirat. Caranya ialah

dengan memperbanyakkan sumbangan harta yang kita sayangi ke jalan Allah iaitu dengan melakukan amalan **waqaf**.

Waqaf dari segi syarak ialah apa-apa harta yang ditahan hak pewaqaf ke atas harta tersebut daripada sebarang urusan jual beli, pewarisan, hibah dan wasiat di samping mengekalkan sumber fizikalnya, untuk kebajikan dengan niat untuk mendekatkan diri pewaqaf kepada Allah.

Di negara kita, amalan berwaqaf telah lama diamalkan oleh generasi yang terdahulu. Mereka telah berjaya mewaqafkan harta melalui pembinaan masjid-masjid, sekolah-sekolah, pondok-pondok pengajian dan rumah-rumah anak yatim. Berwaqaf adalah amalan mulia yang dapat melahirkan perasaan kasih sayang, menyemarakkan semangat saling bantu-membantu antara satu sama lain. Sepertimana firman Allah SWT dalam surah Ali Imran ayat 92:

أَعُوذُ بِاللَّهِ مِنَ الشَّيْطَانِ الرَّجِيمِ

لَنْ تَنَالُوا الْبِرَّ حَتَّى تُنْفِقُوا مِمَّا تُحِبُّونَ وَمَا تُنْفِقُوا مِنْ شَيْءٍ فَإِنَّ اللَّهَ بِهِ عَلِيمٌ

Maksudnya: “Kamu tidak sekali-kali akan dapat mencapai (hakikat) kebajikan dan kebaktian (yang sempurna) sebelum kamu dermakan sebahagian dari apa yang kamu sayangi. Dan sesuatu apa jua yang kamu dermakan, maka sesungguhnya Allah mengetahuinya”.

Sidang Jumaat yang dirahmati Allah,

Di negeri kita khususnya, Majlis Agama Islam Negeri Pulau Pinang (MAINPP) telah menyediakan satu alternatif kepada pelaksanaan ibadah waqaf yang berkonsepkan wakalah melalui dana waqaf Pulau Pinang. Sama ada melalui potongan gaji bulanan atau pembayaran secara atas talian. Wakalah bermaksud para penyumbang mewakilkan kepada Majlis Agama Islam untuk mewakafkan mana-mana harta kekal dengan niat kerana Allah Taala. Ini merupakan satu usaha untuk menggembeling kerjasama ummah untuk bersama-sama melaksanakan ibadah waqaf walau pada tahap manapun kemampuan ekonomi seseorang.

Institusi masjid juga dapat berperanan memperkasakan ibadah waqaf ini dengan menyumbangkan misalnya 10% hasil dari kutipan Jumaat kepada pihak Majlis Agama Islam pada setiap bulan. Secara tidak langsung jemaah yang menghulurkan derma setiap kali solat Jumaat, akan berkongsi saham waqaf yang berkekalan manfaatnya hingga ke hari akhirat.

Diriwayatkan dari Abu Hurairah, Rasulullah SAW bersabda:

إِذَا مَاتَ ابْنُ آدَمَ انْقَطَعَ عَنْهُ عَمَلُهُ إِلَّا مِنْ ثَلَاثٍ:
صَدَقَةٍ جَارِيَةٍ، أَوْ عِلْمٍ يُنْتَفَعُ بِهِ، أَوْ وَلَدٍ صَالِحٍ يَدْعُو لَهُ. رَوَاهُ مُسْلِمٌ.

Yang bermaksud: “Apabila seorang hamba meninggal dunia, maka terputuslah darinya amalnya kecuali dari Tiga perkara iaitu sedekah jariah, ilmu yang diambil manfaatnya, anak soleh yang mendoakannya”. (Hadis Riwayat Muslim)

Sidang Jumaat yang dirahmati Allah,

Pada saat yang penuh barakah ini marilah kita berselawat ke atas nabi Muhammad SAW yang membawa petunjuk dan rahmat kepada kita sekalian sepertimana perintah Allah dalam surah al-Ahzab, ayat 56:

أَعُوذُ بِاللَّهِ مِنَ الشَّيْطَانِ الرَّجِيمِ
إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا

“Sesungguhnya Allah dan malaikat-Nya berselawat kepada nabi ﷺ (Muhammad SAW) wahai orang yang beriman, berselawatlah kamu kepadanya serta ucapkanlah salam sejahtera dengan penghormatan yang sepenuhnya”.

اَللّٰهُمَّ صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ وَعَلَى آلِ سَيِّدِنَا مُحَمَّدٍ. كَمَا صَلَّيْتَ وَسَلَّمْتَ وَبَارَكْتَ عَلَى سَيِّدِنَا اِبْرَاهِيْمَ وَعَلَى آلِ سَيِّدِنَا اِبْرَاهِيْمَ فِي الْعَالَمِيْنَ اِنَّكَ حَمِيْدٌ مَّجِيْدٌ.

اَللّٰهُمَّ اغْفِرْ لِلْمُسْلِمِيْنَ وَالْمُسْلِمَاتِ وَالْمُؤْمِنِيْنَ وَالْمُؤْمِنَاتِ الْاَحْيَاءِ مِنْهُمْ وَالْاَمْوَاتِ. اَللّٰهُمَّ اَرِنَا الْحَقَّ حَقًّا وَاَرْزُقْنَا التَّبَاعَةَ وَاَرِنَا الْبَاطِلَ بَاطِلًا وَاَرْزُقْنَا اجْتِنَابَهُ، بِرَحْمَتِكَ يَا اَرْحَمَ الرَّاحِمِيْنَ.

اَللّٰهُمَّ اَنْزِلِ الرَّحْمَةَ وَالسَّكِيْنَةَ وَالسَّلَامَةَ وَالْعَافِيَةَ عَلَى مَلِكِنَا، كباوه دولي يغ مها موليا سري فادوك باكيندا يغ دثرتوان اكورغ ك-انم بلس، اَلسُّلْطَانُ عَبْدُ اللّٰهِ رِعَايَةُ الدِّيْنِ اَلْمُصْطَفَى بِاللّٰهِ شَاهِ ابْنِ الْمَرْحُومِ سُلْطَانِ حَاجِ اَحْمَدُ شَاهِ اَلْمُسْتَعِيْنِ بِاللّٰهِ، وكذلك مولانا توان يغ تراوتاما تون داتوء سري اوتاما دكتور حاج عبد الرحمن بن حاج عباس يغ دثرتوا نكري قولاو فينغ.

رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ.

عِبَادَ اللّٰهِ ! اِنَّ اللّٰهَ يَأْمُرُ بِالْعَدْلِ وَالْاِحْسَانِ وَاِيتَاءِ ذِي الْقُرْبَى وَيَنْهَى عَنِ الْفَحْشَاءِ وَالْمُنْكَرِ وَالْبَغْيِ، يَعِظُكُمْ لَعَلَّكُمْ تَذَكَّرُونَ. فَادْكُرُوا اللّٰهَ الْعَظِيْمَ يَذْكُرْكُمْ وَاشْكُرُوا عَلَى نِعَمِهِ يَزِدْكُمْ وَاسْأَلُوهُ مِنْ فَضْلِهِ يُعْطِيْكُمْ وَلَذِكْرُ اللّٰهِ اَكْبَرُ وَاللّٰهُ يَعْلَمُ مَا تَصْنَعُونَ.